

Ny Valosoa sy hadihady

17 martsa 2009, ny tantara tsy fanadino

Tena fanonganam-panjakana no nataon-dRajoelina sy ny forongony

Ny tantara tsy fanadino, 13 taona lasa izay ny fanonganam-panjakana nataon-dRajoelina sy ny forongony, tamin'ny 19 martsa 2009. Iny zavatra mamafady nataon'izy ireo iny no mampitontongana amin'ny lafiny rehetra ny zava-misy eto Madagasikara hatramin'izao, fahapotohana eo amin'ny lafiny rehetra.

Daty manandaza sy manan-danja eto amin'ny Firenena ny andron'ny 17 Martsa. Tsara raha tsiahivina ny tantara, tsy adinoina ary tsy disoina. Feno 13 taona afak'omaly, ny fametraham-pialan'ny Filoham-pirenena Marc Ravalomanana, taorian'ny tery sy fandrahonana nataona andian-tafika nikomy sy nanampy ireo mpanongam-panjakana tamin'ny hetsika 2009. Izany dia nialohavan'ny fakàna fahefana teny andalambè, fanendrena governemanta tetezamita teny amin'ny Kianjan'ny 13 Mey, fandroba: Alatsinainy Mainty 26 Janoary, fitondrana andian'olona nanafika ny lapam-panjakana Ambohitsirohitra ny 7 Febroary, sns... Rehefa avy naka ny Lapan'Ambohitsirohitra ny alin'ny 16 Martsa 2009 ireo andian-tafika mpikomy, tamin'ny alalan'ireo fitaovam-piadiana norobaina tao amin'ny Etamazaoro dia nanao hazalambo ny Filoham-pirenena sy ny fianakaviany. Voatery nanao fanambarana araka izany ny Filoha Marc RAVALOMANANA ny antoandron'ny 17 Martsa 2009 tao lavoloha : nandray ny Didy hitsivolana fanolorana ny fitantanana feno ho an'ny "Directoire Militaire", natao teo anatrehan'ny Ambasadaoro vitsivitsy sy ny solontena maharitra ny Firenena Mikambana, Tiebéle Dramé.

Nitsimbadika tanteraka anefa ny raharaham-pirenena satria ny tolakandra'io, rehefa nampivory an'ireo mpitarika 4 ao amin'ny FFKM 4 ny Fianakavianambe Iraisam-pirenena na Communauté Internationale, notarihan'i Tiebéle Dramé sy Ouedraougo, niaraka tamin'ireo manamboninahitra ambony 3 voatendry hitantana ny Directoire Militaire amin'ny maha "Anciens des plus hauts gradés" azy ireo dia ny Vice-Amiral Hyppolite Ramaroson, ny General de division Ranto Rabarisoa sy ny General de division Razafindralambo Rivo,... rehefa nanao fanambarana ofisia-

lin'ny Directoire Militaire ry Ouedraougo. Fanambarana izay notsipahan-dRajoelina hatramin'ny farany, ka nivoaka ny trano fivoriana izy sy ny ekipany.

Raha tsiahivina dia nanatrika izany fivoriana tao Antanimena izany ny General de division de la gendarmerie Ramanarivo, Andry Rajoelina, Monja Roindefo, Ny Hasina Andriamanjato, ny kolonely Rakotonandrasana, ny kolonely Ndrinarijaona sy ny officiers vitsivitsy, niaraka tamin'i Ratsirahonana Norbert Lala.

Baiko azon'ny manamboninahitra lefitra notarihan'ny kolonely Charles Andrianasoavina tamin'izany, ny tsy maintsy hanerena ireto manamboninahitra faratampony ireto, mba hanolotra ny fahefana ho an'i Andry Rajoelina.

Nisy arak'izany, ary teo anatrehan'ny Communauté Internationale sy ny mpanao gazety maro, ny fakana an-keriny "kidnapping", namoahan'ireto farany ireo lehibena foloalindahy nahazo fahefana sy ny mpitarika ny FFKM tao anaty efitrano fivoriana.

Nentina teny amin'ny toby CAPSAT izy ireo, nambenana am-bava basy, noterena hanao sonia sy hamaky ny fanambarana mitsipaka ny Directoire Militaire, ka manome ny fahefana feno ho an'i Andry Rajoelina.

Tanatin'izany anefa dia niaran'ny herisetra tamin'ny endriny rehetra ireto lehiben'ny tafika sy mpitarika fiangonana ireto, anisan'ny tena nizaka fampijaliana tsy takatry ny saina aman'eritreritra tamin'izany ny Pasitera Lala Rasendrasana filohan'ny FJKM. 13 taona aty aoriana, miha-milentika ny firenena, ary efa be ireo nanenina tamin'ny fanonganam-panjakana mamafady tamin'ny 17 martsa 2009 iny. Tamin'io andro io koa no niala teto an-tanindrazana ny filoha Ravalomanana mianakakavy, herinandro tao aorian'izay izy ireo vao fantatra fa tany Swaziland no nisy azy, ary nifindra tany Afrika Atsimo avy eo, hatramin'ny 13 oktobra 2014 niverenany an-tanindrazana indray. Ny nialany teto, na ny fiverenany teto hatramin'izao dia mbola misitery avokoa.

Niaina

Depiote Todisoa Andriamampandry Tsy ny ministra ihany no tokony hiala fa ny Praiministra koa

Nahitsy ny solombavambahoaka voafidy teny Ambohi-manarina, Todisoa Andriamampandry, raha naneho ny heviny momba ny firafitry ny governemantan'ny Praiminisitra Ntsay Christian ankehitriny. Ny teo ihany no teo hoy izy ary samy tsy nahavita matoa misy ny fanovana governemanta. Tsy ny minisitra ihany no miala fa ny Praiminisitra ihany koa dia tokony hiala. Misy mantsy minisitra efa tsy nahomby tamin'ny asany nefa dia nomena minisitera hafa indray no nomena azy. Teo koa ireo minisitra nanana olana tamin'ny minisitera notantaniny, nefa dia nafindra toerana indray. Tsy hisy fiovana izany eo raha izao governemanta izao no jerena hoy hatrany ity solombavambahoaka ity. Nanamafy izany koa ny solombavambahoaka Mamy Rabenirina, ka nilaza fa na soloina daholo aza ny 80% ny minisitra dia tsy hisy fiovana eo raha tsy ny governemanta manontolo mihitsy no indray miala sy misolo olona vao-vao. Tokony hiaiky ny filoham-pirenena hoy izy, fa tsy mahavita azy ny governemanta, ka tokony hisolo avokoa ary mitovy ny fomba fijery ny raharaham-pirenena tsy mahomby ankehitriny na ny mpomba ny fitondrana na ny mpanohitra.

Rajo



Ny depiote Todisoa Andriamampandry.

TAFATSANGANA NY « PLATEFORME ETAT RÉGIONAL »

Nanolotra lalàm-panorenana vaovao ho fidiana

Tafatsangana anehitriny ny « Plateforme Etat Régional », ivondronan'ny antoko pôlitika isan-karazany, ka nahampahafantarina omaly zoma 18 martsa 2022 tetsy amin'ny Motel de Tanà Anosibe, tamin'ny fitafatafana tamin'ny mpanao gazety. Mpiara-mitantana an'izany « Plateforme Etat Régional » izany Andriamatoa Zafivao Jean Louis, Filoha Mpanorina ny GASYMI, sy Ramatoa Bezaza Marie Eliana, Sekretera Jeneralin'ny antoko PSD. Ahitana Filoha lefitra isam-paritany sy Mpanolotsaina roa ary Sekretera sy Mpitam-bola sy Mpanamarim-bola iray avy ao anatiny, rehefa nisy ny fifampidinihan'ny samy mpiray nosy, araka ny filazan'ny Profesora filoha lefitr'Antananarivo azy.



Ramatoa Eliana Bezaza, iray amin'ireo mpitarika ny "Plateforme Etat Régional".

karana ny fahefan'ny Faritra ary fanenana ny fahefan'ny filoham-pirenena, izay iainana ankehitriny, hita fa mitarika fitangoronam-pahefana ho an'ny filoham-pirenena fotsiny ary mamporisika ny rehetra hanao kolikoly ao anatin'izany. Rafi-pandevozana natsangan'ny mpanjanaka mantsy io « Etat Unitaire » io, raha

ny filazan'ny « Plateforme » ary rafitra fanabotriana olona sy rafitra fandrahana fiainan'olona ihany koa.

Raha ity rafitra « Etat Régional » ity anefa no ekena hitantanana ny firenena, hoy hatrany ny «Plateforme» dia ho foana tanteraka avokoa ireo olana mianjady amin'ny fiainan'ny vahoaka Mala-

gasy ankehitriny : tsy fananan'asa, tsy fahaza-hoana karama sy vatsimpianarana, sns... Amin-dry zareo ireto mantsy dia ny fifandaminana ny fandiampahalemana, no tokony hamehana mialohan'ny fifidianana hatao amin'ny taona 2023.

Tsy ho tompony hangataka ny atiny intsony ny Faritra rehetra, fa samy hitantana ny volany sy ny fandaminana ny Faritra misy azy manokana.

Hitarina manerana ny rafim-pitantanana rehetra misy eto amin'ny firenena ankehitriny : filoha, praiminisitra, senatera, solombavambahoaka, sns... ny fanazavana ny amin'ity lalàmpanorenana "Etat Régional" ity ary hampahafantarina ny vahoaka Malagasy tsy vaky volo hatrany amin'ny fokontany rehetra manerana ny nosy ihany koa ary haely amin'ny alalan'ny tambazotran-tserasera tsy an-kanavaka: Radio, televiziôna, tambazotran-tserasera samihafa ... ihany koa.

Rainilita

TOMONKALO

Fanovana governemanta

Fanovana hafahafa tsy fahita eran-tany, Fa ry Veta sy ry Voata no mamikitra hatrany, Na dia hita tsotr'izao fa efa nanaratsy endrika, Noho ny zavatra nataony sy ny toetrany tsy mendrika !

Fanovana hafahafa tsy fahita eran-tany: Ny nesorina omaly no naverina androany. Ny hangalatra sy hangorona , izay no tanjona hokendrena, Ka mazava fa hitohy ny fanondranam-bolamena !

Fanovana hafahafa tsy fahita eran-tany. Ireo roalahy nanao ny tombana, toa mitohy ny hajambany, Ka raha mbola hifampitantana dia efa tazana sahadry Fa tsy maintsy hianjerazera sy hivarina any an-kady.

Fanovana hafahafa tsy fahita eran-tany. Ny efa maimbo sy masiso no manohy ny hadalany. Tsisy zavatra antenaina ny amin'ireo "mpitondra jamba", Fa andrasana ho hendry , mainka koa manary lamba !

Fanovana hafahafa ! very ianao ry firenena, Ka dia miantso anao indray izay mbola itoeram-pahendrena. Mijoroa ankehitriny n'aiza n'aiza misy anao, Andao hanohitra ny ratsy f'efa tsy izy intsony izao !

DADAN'i ZINA (18-03-22)